

剪錄集序

華亭何良俊元朗撰

徐昌穀有云詩理宏淵談何容易追尋廢句  
信而有徵蓋西京創制大闡五言厥後辭人  
遍相祖襲爰逮魏晉迄於開皇上下九百餘  
年使代有百人則作者一幾於萬矣方其含  
毫伸紙杼思構篇孰不窮鸞翔蕙林庠步辭  
苑者耶然而苦志窮年誰能破的研精白首  
鮮克升堂是以序錄之家校核精審銓綜評

審稍沙慕蕪何得塵茲簡策略存考類休不  
點彼縹緗今稽之鍾嶸所品才一百十有五  
人即王微鴻寶任昉緣起諸編縱或稍有異  
同要不大相河漢觀其識同別玉鑿芋揀珠  
總星羣而芟除存十一於千百固亦嚴矣然  
三品之中惟子建一人獨盡褒美自王劉以  
降互為譏評則知詩之為道可不謂難哉予  
嘗括而論之其大端有二夫鋪張篇什全在  
皇若潤色辭條莫先菁藻譬之衣冕實整飾

章苟於擅美一時必待兼資二者是故張施  
采色著在夏謨次差等威詳於禮藉所謂合  
之則雙美棄之則兩乖者也今試以管蒯疎  
惡縱被之締繡終何能以辯章執物苟白地  
明光錦裁為負版袴亦曹昆所以取譏於孫  
綽者也嗚呼是既然矣究其疵累抑有數條  
夫神宰難馭寄在絕冥意匠無方潛於冲漠  
探之愈窒索之更深是以對客談諧俱能暇  
豫臨文議擬鮮不講張况乎雖假名言而必

欲言尋象外固非詮理而實湏理契環中至  
於遜勢定篇既方圓莫準鑄辭鍊句又玄素  
無別專事浮華則流於輕艷偏崇蘭質則失  
在淺俗苟取優游之致終以闡緩為尤若憑  
迅舉之力遂以揚厲貽誚纏綿情款將同委  
巷之謠精研要眇復似老莊之疏翬翟備色  
終愧力沈鷹隼翰飛更慚乏采或象數繁列  
而神有遁思或興致偶屬而物有隱貌或一  
篇之內魚目與夜光雜陳或數句之中圭璧

同砒砒駢集加以平頭上尾所闕最要四聲  
八病其例亦多懿彼靈均未窺斯秘蠢茲懵  
昧曷究其詳是以世之作者自言人握靈珠  
終是家藏敝帚至有唐貞觀開元間世推極  
盛然自是詩道之一變也下逮宋元風雅幾  
絕戒明

列聖纂服大肆陶鎔羣宰持衡更加領袖上  
播玄籥下傳正聲才情雄健者咸取模於漢  
魏思致清綺者復降意於齊梁由是建安永

明之風洋之乎遍於域中矣唯我華亭地偏  
江左自機雲入洛繼踵曹劉希馮仕梁以肩  
徐庾今雖世代綿越風氣遷殊所賴崑丘岸  
寧猶著爽靈谷水澄泓尚流芳潤故薦紳諸  
公興逢掖數輩時相屬綴富有篇章幾能方  
駕天閑遂欲爭馳王路若我張子玄超則又  
英之挺拔者也間持剪綵集一編以示余曰  
此之象近作總若干首苦於朋遊假索將加  
于木以代傳寫子尚為我序之何子曰夫言

剪者託意體裁曰綵者取喻菁藻觀張子名  
集已備詩家旨要矣及讀之終卷則皆清麗  
婉約綺錯流便羣疵畢去眾美具臻嗚呼使  
鍾參軍復起品裁近代諸家則張子之作將  
非首為鈐錄者耶或以為此作誠為美麗使  
能稍刊蹊徑當不更為盡善乎何子曰夫藝  
家沿襲自昔為然即李空同序昌穀之集譏  
其守而未化蹊徑存焉今觀李公蹊徑更甚  
徐生則知大復舍筏之言亦欺人耳嗟乎駿

骨猶存寧無伯樂雅音獨奏豈乏鍾期悠  
之談孰是知者迴環吟諷輒為序之

嘉靖己酉春三月朔日

剪綵集卷上

雲間張之象玄超著

雜體詩三十首

并序

初陸士衡作擬古詩十二首江文通又為雜  
體詩三十首蕭氏選文並登賞錄嗟夫予每  
觀才士之所作祖述無偏華質具美博綜百  
氏乃稱大成抑將托古意以自明諒無取枝  
葉之肖似也屬文之士曠世間作而才匪圓  
通鮮覩斯義予病居多暇復染翰為之所增  
損者各十人焉雖弘麗不足庶不媿作者之

意云爾

李都尉送別

陵少卿

戚戚歲云暮悠悠秋夜長寒暑互相襲白露墮  
爲霜悲風振野草枝葉萋以黃遊子望故閭感  
物多慨慷蹊谷絕行旅但聞哀鴈翔蘭膏徒自  
明照影慘無光憂思將語誰涕下霑衣裳良友  
當離別携手益彷徨道路阻且脩會晤安可常  
願遺瓊玖音以慰無相忘

班婕妤詠扇

雲紈製團扇輕明等蟬翼寫作芙蓉花翩妍好

顏色承君掌上歡動搖障白日但恐時不保涼  
暄遂相逼零落哀秋風眷恩中路畢

魏文帝遊宴

丕子桓

飛蓋遊西園池閣何清森託乘盛文學高談可  
娛心彈碁間六博悲笳起微吟景風從南來爲  
我吹煩襟芙蓉覆綠水高樹圍重陰遊鱗逐波  
逝飛鳥有餘音零露夜何其明月方照林樂往  
悲復來愴焉愁思侵人生百年期沈浮安可任  
願言共觴酌爲樂當在今

陳思王閨情

植子康

端坐愁思起攬衣步空房階庭苦銷落樹葉  
秋霜月出照帷中哀鴈凌風翔憂懷安可禁徒  
倚情內傷佳人眇何許遠在天一方盛年難重  
至鮮華不再揚時俗薄故愛君豈無捐忘昔爲  
同林鳥今爲參與商寤言撫孤衾膏沐誰見芳  
儻諧皓首期永獲心所望

劉文學懷友

楨公幹

憶昔侍公子飛蓋相追隨嘉賓列廣坐華燈吐  
流輝文酒共燕樂極夜且忘疲何爲隔清  
晤曠有違思君不能寐仰視明星稀寂寥

昔悵西苑扉翠竹自成行芙蓉被清池輕葉  
隨風墮寒鳥群鳴飛四節更代謝歲月遞差馳  
離人易傷感涕下情依依引領長歎息叙意疇  
予知安得接首歡以慰饑渴思

王侍中從軍

黎仲宣

孰云從軍苦貴在得所親群雄橫關戰中國無  
紀經我君亶神武覽往功速成奇謀運帷幄赫  
赫東南征萬艘塞江河戈甲成山林旌旗耀日  
光猛將何縱橫一舉虜遂滅戎狄莫我承鯨鯢  
盡芟夷反旆歸鄴城征夫咸悅康秋風淨沙塵

九州率遊軌宇宙歌太平彼美鈞璜叟佐命姬  
以興竊懷素餐耻懼無匹夫能鉛刀安所用賈  
勇期先鳴推誠報明主庶幾奮忠貞夙夜誓匪  
懈陳力殉國恩豈如東山詩悽悽家室情

徐文學室思幹偉長

貧賤無易交况乃糟糠妻想君若平生涼暄苦  
難期谷風感棄捐永爲後世嗤君行不顧返妾  
夢相因依想君情更重大義諒不虧

陳書記遊覽琳孔璋

涼風應秋至歲月忽已闌屏處情不娛言念心

所歡清泉恣遨遊高城共盤桓肆望極原野返  
駕臨迴澗寒蟬響北林哀鴈鳴南灘惜哉年運  
徂怆慨起長歎功名不早樹金石安所觀閉關  
修孔業勵志慚素餐庶幾聞大道芳名流不刊

阮書記雜詩瑀元瑜

初秋發涼氣淒風吹我衣如何客遊士歲暮忘  
所歸引領望故鄉目極孤鴻飛朗月方在天明  
星猶未稀淹淹不能旦鷄鳴夜何其起坐增歎  
息涕下安可揮

應文學侍宴瑀德璉



公子多暇豫撫時念維良高閣延廣宴西園共  
翱翔邂逅風雲會託身翰墨場蘭藻曄春華凌  
波飛羽觴白日既西匿歡樂殊未央

嵇中散言志

康叔夜

靈鷲振遠霄斥鷃翔蒿枝遊心仰葛天翹首傲  
皇羲騰躍遊層城徘徊鍾山崖吾欲偕人群沈  
浮不相宜自愧乏智巧時俗紛是非貞情焉所  
告惻愴將訴誰願言遊八極松喬相與期倏忽  
九萬間比翼凌風飛朝登紫虛宮夕宴瑤光池  
逍遙離天網禍孽安得施遺言謝世不榮華信

多危玄靖保太真億齡良可希

阮步兵詠懷

籍詞宗

獨出上東門遙望首陽岑念彼采薇士悽悽有  
遺音寒風振四野日夕西山陰荒草何蕭條松  
楸鬱森沈求仁苟不虧尼父所猶歎其人雖已  
亡千載傷我心

張司空寒夜

華茂光

四時遞變化懸象代低昂玉衡指仲冬繁露降  
為霜驚飈振疎木哀鴈眇無行蘭燈照孤影積  
雪流素光客子感歲暮不眠知夜長臨杯乏歡

娛撫枕增淒涼空言莫予和憂思結中腸

張著作招隱

載五陽

朝野判行藏沈浮豈同類寰中苦多患泉壑饒  
清思鵬鳥運天池扶搖孰能制燕雀翔下林自  
罹網罟計潛顯雖在時憂樂各有志譬之千里  
途駿駑從所至飄然脫世局獨攬巢由轡保已  
悟無爲榮辱兩相棄

張黃門苦雨

協景陽

靈鶴啖重霄蒼龍躍海濱屏翳號赤松天畢應  
玄冥連雲千里晦霖雨萬壑傾浩汗豈夕滂

泥越九旬庭際集鳴蛙電下產游鱗巢民不寧  
處淅水感襄陵古壁浮蒼苔幽窓生綠萍家徒  
擔石虛坐有鉛槧盈烈士垂高節處困道逾亨  
雖同在陳厄嗤彼慍見情蕭條念禁叟慷慨慕  
顏生

陸平原羈宦

機士衡

撫劍荷嘉運假檝遠徂征祖餞豈異族眷戀皆  
密親徘徊谷水陽悽愴昆山陰岐路一何阻野  
途曠無隣發軫遵河洛驅馬越梁陳承華厠多  
士崇賢列具臣濯足躍龍池振羽鳴鳳林予本

水鄉士信多桑梓情驚感動寒木停雲冠高峯  
歲月忽已易還期不可尋寤寐結永歎辛苦難  
爲心愧無凌風翰羨爾歸飛禽

陸清河贈內雲士龍

池有比目魚林有比翼禽飛潛固殊性會并豈  
異形投歡類膠漆結好諧瑟瑟關河曠不達夢  
寐諒可親貞心自匪石巧笑徒傾城願言篤終  
始列宿以白情

潘貴門倦客寄安仁

白日升車井米明應南離炎光苦蒸鬱烈景何

赫羲晨興煩几案晝寢倦床帷絨葛無爽氣輕  
絛少涼颺高館榮丹椹幽齋列蒼椅榴葵耀中  
園芙蓉挺清池唼唼蟬方噪翩翩鵙始飛坐覽  
綺雲散臥懷甘露滋撫躬荷休眷逐食屢遷移  
豈云薄邑小但恐忝時熙徃役歷四載嘉政愧  
兩岐禮樂猶未敷訟評幸已稀眷焉思舊國悵  
望空依依

潘太常迎駕正叔

攬轡卽長路戒倚迎遠蹕朝發南山隅暮宿洛  
水側戈甲明秋霜旌旗晃朝日鮮霞有餘映驚

颺起寒色道逢老成士致詞殊愴惻皇晉遺  
九圓暉值薄蝕金馬橫氛霧銅駝奔荆棘神龍  
窘天步祥鸞鍛雲翼徒懷姬孔情未整孫吳術  
止駕且莫前幸君一察識

左記室詠史

思太冲

絳侯雅吹簫給役何悽愴酈生好讀書時俗譏  
狂放樊噲沛中隱屠狗薄自養公孫家素貧牧  
豕菑川上偉哉四丈夫事漢扶興王儻非風雲  
遇將相豈所望才高運不達自古多怏怏何世  
無賢豪棄之同草莽

曹司馬感舊

據顏注

富貴多黨與貧賤寡賓朋田文欲謝客翟尉勸  
門箴寒暑遞進退賈鬻代虛盈游鱗赴深淵鳴  
鳥去疎林今我惟困窮流離曠無親患難賴賢  
達款款見素誠結約同要離誓志殉荆卿世故  
勿復道感茲斷金情

劉太尉傷亂

琨越石

皇晉邁厄運神州蕩無章群妖肆豺虎列宿紛  
攙搶伊予厠鼎司三世荷寵光感恩思振奮懷  
古多慨慷傳說興版築武丁滅鬼方秦相百里

奚霸業遂以昌夷吾佐齊桓天下乃一匡安劉  
仗周勃帝漢賴子房寤言思數子揆子景周行  
攬衣中夜起精爽若飛揚獨坐哀憤集行吟少  
悅康功名未及建玄髮忽已霜盛年無重至春  
華豈再芳少壯不自力老大徒悲傷何用慰我  
私畢志贊家邦

盧侍郎時興

諱子諒

冉冉暝運移促促衡紀積四氣如環周歲月忽  
已易北望沙漠垂南臨晉京陌繁露浮桂嶺清  
飈動蘭澤肅肅孤鴻寒烈烈哀蛩夕明河耿迢

遊荒楚增悽戚登闔感長徽遵塗嗟遠役覽物  
思已甚撫化情彌劇曠矣達人懷翩然聊自適

郭弘農遊仙 璞景純

總轡騰九萬飛軀歷遐荒青鳥乘煙征玄鶴隨  
風翔神闕排霄出靈宮煥霞光窈窕明真館徘徊  
太微堂羽童吟翠華玉嬪歌紫芳仰掇金莖  
盞俯吸雲瓶漿鸞旌訪南嶽鳳籟宴西王適路  
無滯軌所在逍遙鄉

陶徵君詠貧

潛淵明

衆草被階路猗蘭屏遐荒習習谷風起何時見

芬芳榮木耀晨華飛鳥相與翔翩翩凌雲屬所  
志非稻梁固窮乃素節懷抱飽風霜知音已矣  
夫優游安足傷

顏特進使洛

延年延之

振策戒儔侶驅車涉險巖飛蓋指天室聳轡越  
鼃池逶迤吳楚道容裔梁宋圻周南忽不遠晨  
暝瞻維伊覽古渺盛際懷賢曠休期峻隅不再  
峙曲池既已夷壇館饒弋釣堂殿羅茅茨皇猷  
廓宇宙使役方差馳灌莽杳無極叢薄紛相依  
遵渚尚有往臨觴戚不怡征徒怯霜氣鳴馬苦

風威昔邁藹芳節今來屢愆違驚沙固長歎孤  
蓬良自悲

謝臨川遊山

靈運

客行曠登覽羈心展遊陟衰糧度瑤岑振衣尋  
石室源深洞屢迷逕險巖逾密重林散輕霧絕  
壁映初日鳥鳴識節變草綠知春及天桃始發  
溪荷蘭漸盈澤採藥遵靈丘援蘿入幽谷緬逸  
隱士居想像仙人宅朝窺鸞鶴逝夜聽狸猿泣  
水鏡含清暉松門帶暝色近澗虹文丹遠峯嵐  
氣黑雲歸影難留泉飛響易急觀奇道轉遠探

異情未畢候月弄澄鮮  
冷霞羨高逸適已  
忘達生賞無極終然得所遣  
儻值同懷客

謝法曹擣衣

惠連

王衡感邁運秋夕生微涼  
園桂飄繁露庭梧墮  
清霜瑟瑟金風起耿耿銀漢光  
流螢度雲幕明月照蘭房  
念君方遠役望妾理衣裳  
爭粧出中閨緩步遵北堂  
楹迥砧逾發軒高杵絕揚  
踟躕拂錦石容與艷流黃  
製成比翼文薰以如蘭芳  
嘉期阻良夜引領望異鄉  
素情託鴈足丹心在魚腸  
寒服早須寄所悲千里長

謝宣城晚眺

眺去聊

引領望長安登高眺京郢  
城闕麗中天崔嵬具可指  
流煙起復散秋河淨如洗  
疎楊渺星槎垂虹亂雲綺  
幽客滯河陽華屨垂宴喜  
撫景方自啻信美其吾里  
無由稅歸驂客念紛何已

鮑參軍戍邊

照明遠

束髮遠辭親仗劍且橫行  
烽火警薊北羽檄亂邊庭  
高秋弦矢銳虜寇掃未平  
護羗募壯士校尉選良兵  
連旗朝出塞飛笳夜向城  
刀斗鳴朔風戈甲被胡塵  
龍沙衝陣起魚雲逐墨生  
戎車

淹轉戰征鞍倦苦辛歲寒知勁節世亂識忠  
畢志在報國微軀從此輕

剪綵集卷上

卷上 在衛道 校刊

剪綵集卷下

雲間張之象玄超著

樂府詩七十首

朱鷺

振鷺芙蓉水乘流濯錦磯因風展丹翼映日理  
朱衣颯下周雍舞或向楚宮飛願厠藏珠鳥聊  
復借光輝

芳樹

婀娜千株樹芳菲二月時紅顏含曉日翠色影  
華池葉密鶯來早花香蝶去遲藁砧何處在那



得寄相思

出塞

鐵騎向邊州金笳度隴頭雲黃朝似暮草白夏  
先秋漢月懸龍劍胡塵上豹裘只持身許國非  
是覓封侯

入塞

都護平胡日將軍破虜年塞塵行處滅隴月望  
中圓戰馬嘶春草歸旌度曉煙功成報明主麟  
閣定誰賢

雨雪

雨雪正霏霏從軍出武威馬凝銀磧度人似玉  
門歸風急笳應斷雲寒鴈不飛誰憐漢庭使白  
首節旄稀

聽馬

蹀躞青驄馬長征歲已闌將軍懸玉鐙都護飾  
金鞍瀚海風霜苦天山道路難君恩猶未報一  
戰取樓蘭

劉生

任俠三秦士劉生最可論博徒從劇孟劍術教  
王孫朱邸桃花馬青樓竹葉樽甘心狗知已不

負信陵恩

採桑

紫陌誰家女紅顏絕世無春風飄綺縠朝日映  
流蘇玉腕枝輕折金籠葉細鋪不應藏巧笑畏  
欲比羅敷

艾如張

上林聊艾草中野欲張羅寒風嘶羽騎秋霜照  
玉珂豪雄稱六郡任俠擅三河不惜明珠盡高  
飛柰雀何

上之回

天營接隴右法駕幸回中豹尾開黃道鸞旗曳  
彩虹望仙銅柱立揚武玉門通返蹕高靈館流  
歌憶大風

戰城南

塞北追胡騎城南合漢兵陰雲看結陣暈月想  
圍營義激三軍振名從一戰成凱旋應勒頌歌  
舞向承明

巫山高

巫峽多奇嶺陽臺逼翠微朝雲縈錦色暮雨濕  
羅衣谷靜猿長嘯林昏鳥獨飛仙姬無處所客

思更依依

君馬黃

寶馬黃龍種雕鞍翠柳陰奔霄躡飛影伏櫪振  
哀音周澤能歆玉燕臺詎惜金幸蒙一顧窳方  
知千里心

有所思

最恨年年別舍情獨倚門蘭芳憶公子草綠怨  
王孫錦字織愁緒羅襟濕淚痕宵來理琴曲腸  
斷不堪論

雉子班

山梁舒弱羽麥隴試新聲彩臆文初變朱冠色  
未明箭飛賈妻笑琴鳴衛女情儻向中牟路相  
憐不復驚

臨高臺

崇臺聊騁望羈旅憶經年綠樹浮雲外青山落  
日邊天空初見月野曠未生煙獨此登臨處鄉  
心萬里懸

隴頭水

征人度隴頭隴水漫悠悠泛笛催鄉思飛笳動  
客愁腸縈九迴阪淚咽兩分流不獨燕臺上悲

歌易水秋

折楊柳

倡園二月時楊柳正垂絲燕拾河堤絮鶯啼谷  
口枝玉樓驚節變紫塞見春遲併作相思曲流  
芳難再持

關山月

月照陰山外秋高瀚海邊全形方學鏡半影更  
疑弦久戍何時滿長征幾度圓望鄉千里思耿  
耿夢中懸

洛陽道

洛陽佳麗所風物藹春光柳陌青絲騎桃源紅  
粉粧採桑值秦女擲果望潘郎日暮笙歌合漣  
留輦路傍

長安道

長安開大道城闕映朝霞朱門五侯第青槐七  
貴家天桃迷舞席巧鳥雜鳴笳向夕紅塵起金  
羈訪狹斜

紫驢馬

天馬來西極君王重紫驢紅塵風處起赤汗日  
邊流影照桃花水聲悲首偕秋橫行十萬里

憶大刀頭

梅花落

玉樹飛花早金闈引恨長雪明難見影風急易  
聞香舞處飄羅袖歌邊繞畫梁歲華憔悴盡魂  
夢憶遼陽

陌上桑

秦樓罷曉粧南陌採春桑枝新交柳翠葉密隱  
鶻黃駛摘時聞劍食歸易滿筐使君休遣問千  
騎在東方

王昭君

鸞殿一朝別龍沙萬里行夢隨秋鴈反愁逐暮  
煙生玉筋風前淚胡笳馬上聲惟餘漢宮月長  
照妾心明

銅雀妓

試上銅臺望西陵起暮煙心傷玉座下淚盡總  
帷前作伎聲難聽分香爰已捐獨憐三五明  
月向誰圓

長門怨

金屋恩初歇長門怨已深無情委團扇有恨託  
鳴琴塵滿鴛鴦薦香銷翡翠衾何時魂夢裏仍

得舊來心

班婕妤

玉輦長承寵何爲團扇辭蛾眉橫相妬方倚細  
腰肢妾意終無改君恩不可持倩看秋草色非  
復艷陽時

長信怨

日落昭陽殿風淒長信城履綦難再得歌舞最  
關情舊草隨恩歇新苔逐怨生如何比團扇橫  
有合歡名

妾薄命

名姬偏嫁晚蕩子獨歸遲秋思悲紈扇春歌恨  
廢度笳吟蔡女拍錦織寶妻詩寂寂長門掩佳  
期不可知

白雲臨酒

酒色含濃淡雲光漾有無迴波飄玉葉泛斗映  
瓊酥蓋轉依梁市花開覆阮壚瑤池斝浮白縹  
緲在蒼梧

丹霞蔽日

旭日臨東井朝霞上翠微何因白虹貫先共赤  
烏飛錦蓋初籠鏡金輪欲作衣願言開五色天

路仰光輝

白露爲霜

商風初應節繁露已成霜皎奪齊紈色寒侵楚  
劔光渚秋蘆早白園晚菊先黃送鴈雲千里懷  
人水一方

飛雪覆庭

深巷凝寒雪間庭散夕霏縈空疑絮舞拂樹訝  
花飛玉潤繁霜色珠流明月輝浮光映孫案積  
素掩袁扉

彩虹帶天

落日開新霽文虹竟遠霄圍空疑作暈架漢學  
成橋鳥拂丹霞麗龍飛赤電遙何當振靈劔耿  
耿夜光搖

有女懷春

綠草正依依佳期猶未歸巧鶯當戶轉新燕向  
窓飛柳絮飄歌扇梅花落舞衣已愁春色暮何  
處寄芳菲

鳳凰來儀

鳳鳥垂靈應簫韶集勝羣舞從丹穴見歌向紫  
庭聞覽德翔千仞歸昌麗五雲當令止阿閣長

瑞聖明君

鶴鳴九臯

九澤何迢遞，仙禽信可憐。  
長鳴夕露下，清嘖曉風前。  
韻徹雷門鼓，聲悽牧子絃。  
凌雲自有志，終冀一聞天。

目送歸鴻

極目關山遠，征鴻何處歸。  
一聲雲外落，片影月中飛。  
渡海書難寄，橫空陣亦稀。  
長懷不得反，客淚欲霑衣。

燕燕于飛

燕燕喜芳菲，翩翩弄羽衣。  
影飄春水近，聲逐午風微。  
繡戶還同入，雕梁幸自依。  
蘭闥有愁婦，腸斷憶雙飛。

三五明月滿

玄兔當秋滿，瑤蟾向夜來。  
珠生非以蚌，鏡掛不關臺。  
影逐階棠徹，光從苑桂開。  
賞心誰共此，愁思渺難裁。

秋河曙耿耿

天河秋耿耿，雲路淨無塵。  
浪色澄於練，波光白似銀。  
月明一片水，星隔兩年人。  
寄謝乘槎客，何



時更問津

風生翠竹裏

清風臨嶰谷脩竹映昆池拂水疑鸞舞飄花似  
鳳儀徘徊吹晚葉颿颿動秋枝詎假伶倫採仙  
音幸自怡

白雲抱幽石

縹緲白雲英參差翠石生仙衣臨鏡起羽蓋倚  
樓成錦映蓮花秀纓飄玉女輕聊因穀城隱詎  
有帝鄉情

浦狹村煙度

輕煙散落暉狹水映斜扉霧合連村暗風來隔  
浦飛浮空吹不斷入樹縷仍微漁父何愁暮前  
溪待月歸

澄江靜如練

最愛澄江好何如素練明雲飄衣影散浪息錦  
文平有月光逾皎無塵色更清詎逢鮫女織聊  
濯楚臣纓

山水含清暉

山水勝蓬丘清暉足宴遊日華天際合霞色鏡  
中浮霧斂千峯霽河明萬里秋定知娛賞極不

復有羈愁

名都一何綺

名都信佳麗城闕藹春陽柳映銅溝碧花飛綺  
陌香妓樓臨翡翠舞殿接鴛鴦別有金張客鐘  
鳴樂未央

西園遊上才

西園盛文雅上士有應劉綺席星文動瑤觴月  
影浮池蓮迎早夏苑桂艷新秋好客惟公子長  
聞鄴下遊

爲我彈鳴琴

起坐拂清琴琴鳴淚滿襟楚妃聊自歎梁甫爲  
誰吟鶴度松風遠鴻歸竹雪深曲中多古調何  
處覓知音

長笛吐清氣

商聲破煙竹羌笛剪霜筠柳發臨邊曉梅開度  
隴春調悲猶感舊曲變忽驚新試遣清宵奏應  
多掩淚人

落落窮巷士

幽人耽偃卧陋巷絕交游范甌塵應滿袁扉雪  
尚留著書消白日歌頌振清秋結駟非吾羨長

懷泌水流

採藥遊名山

至藥人間少靈仙物外求石壇瑤草秀玉洞綵霞流守價嫌人識逃名畏迹留始知長安市不及灞陵遊

遊子戀故鄉

蕩子嗟于役他鄉怨未歸暮衾還夢遠寒鴈寄書稀雨雪嘶征馬風塵染客衣故園千里外悵望白雲飛

愁人知夜長

羅帳耿蕭條蘭燈伴寂寥肝腸憶處斷客鬢暗中消月度銀河緩風傳玉漏逢多愁難達旦端不爲寒宵

南國有佳人

吳越稱娃麗芳顏出衆中柳眉裁淺黛桃臉妬新紅妙舞能迴雪輕腰不借風先傾李城北詎比宋家東

胡姬年十五

胡女倚芳年青春最可憐纖腰初學柳媚臉乍窺蓮留客貽龍鏡當壚拂鳳絃堪持對明月三

五正嬋娟

班去趙姬升

長信沉幽日昭陽幸御年寵將團扇歇恩向舞  
腰偏但覺新移舊非關醜避妍悲秋更懷古淚  
盡綠衣篇

下山逢故夫

棄婦情還重思君痛有餘肯將離劍合莫並斷  
絃虛縑素知誰好蘼蕪怨不舒天涯今咫尺別  
望少踟躕

班竹掩團扇

湘女啼痕在班姬扇影愁月圓長信晚風起洞  
庭秋染翠雖難變逢涼苦易休虞心與漢恨千  
載共悠悠

錦石搗流黃

錦石搗寒衣瓊閨愴夜棲杵聲依鴈訴砧響亂  
蛩啼宛轉風逾緊徘徊月漸低綵書徒自襞無  
信往遼西

蘭澤多芳草

荷蘭生野澤麗草應春陽影接金芝秀芳連玉  
樹長楚臣憐作佩燕女夢爲祥莫以幽居怨終

聞入室香

秋菊有佳色

春色人俱喜秋花我獨憐  
金英垂露下翠葉舞  
風前照水偏成景  
凌霜不改妍九華如可服  
聊以引芳年

涉江採芙蓉

蓮浦乘秋漲  
蘭橈泛夜光  
水開明月鏡  
花學美人妝  
碧浪千層色  
紅英十里芳  
只愁歸棹晚  
鳧鴈欲凌霜

涼風動秋草

秋草振涼颺  
離憂積來宵  
遶荒青色改  
階冷翠痕銷  
拂蕙花方歇  
吹蓮葉已凋  
感時衣早寄  
惟恨玉關遙

雪裏覓梅花

最憐春氣近  
梅雪兩相將  
色助瑤華好  
光流玉樹長  
月來還共白  
風去不同香  
零落雖遲早  
花飛各自傷

園柳變鳴禽

細柳舒新翠  
嬌鶯換好音  
乍聞知歲隔  
忽見識春深  
映水飄龍帶  
因風雜鳳琴  
何當久離別  
感

物盡傷心

岸花臨水發

新花艷早年照水更翩妍  
濯處看成錦開時誤是蓮  
影浮桃浪遠光映綵霞鮮  
似與紅妝競俱飛玉鏡前

邊馬有歸心

鐵騎十年征金微萬里行  
鳴珂經鴈塞束轡度龍城  
首帶秋風冷桑榆夕照明  
未由馳上苑辛苦獨傷情

魚躍水花主

魚躍戲芳洲花生簇細漚  
巧將浪開合能逐水沈浮  
碎影因風散圓文帶月流  
蓮池自有樂安用北溟遊

剪綵集卷下

終

弟子程衛道校刊